

# OWEN, MORRIS BRYNLLWYN (1875 - 1949), athro coleg, hanesydd eglwysig, a gweinidog gyda'r Bedyddwyr

**Enw:** Morris Brynllwyn Owen

**Dyddiad geni:** 1875

**Dyddiad marw:** 1949

**Rhyw:** Gwryw

**Galwedigaeth:** athro coleg, hanesydd eglwysig, a gweinidog gyda'r Bedyddwyr

**Maes gweithgaredd:** Crefydd; Addysg; Hanes a Diwylliant

**Awdur:** Thomas Richards

Ganwyd 15 Mawrth, 1875, yn y Crymllwyn Bach, plwy Aber-erch, Sir Gaernarfon; ar ôl treulio peth amser fel gwehydd yng Nghymru a Lloegr, aeth i Academi Holt, ger Wrexham, ac oddiyno yn 1897 derbyniwyd ef yn aelod o goleg y Bedyddwyr ym Mangor, a myfyriwr hefyd yng ngholeg y Brifysgol. Graddiodd yn B.A. yn 1903, a chafodd ei ordeinio yn 1902 yn efrdydd-weinidog yn Llandegfan. Aeth am ei gwrs diwinyddol i goleg Presbyteraidd Caerfyrddin, a graddio'n B.D. yn 1906. Am ran o 1906-7 bu'n weinidog yn Llaneurwg ger Caerdydd, ond cyn diwedd 1907 gwahoddwyd ef i fod yn athro yn ei hen goleg yng Nghaerfyrddin, gan broffesu Athroniaeth Crefydd hyd 1912 a Hanes yr Eglwys o hynny hyd ei farw, testun y cafodd ei wybodaeth o'r Tadau Groeg a Lladin lawn gyfle. Ef hefyd oedd llyfrgellydd y Coleg; yn ychwanegol, bugeiliai (er 1925) eglwysi'r Bedyddwyr yn y Felin-gwm a'r Felin-wen. Bu'n olygydd *Seren Cymru*, 1930-33. Gŵr tawedog, myfyriol, a swil ydoedd, ond daeth yn sydyn amlwg yn Undeb Caernarfon, 1937, cyfarfod y Gymdeithas Hanes; rhoddai anerchiad yno ar 'Christmas Evans a'i le yn ei gyfnod', llawn hiwmor sych a dangos meistrolaeth drwyadl ar y cefndir. Argraffwyd hwn yn *Nhrafodion* y gymdeithas am 1938, a'i ddilyn gan ysgrif yn *Nhrafodion* 1945-47 ar 'Fedyddwyr dair canrif yn ôl', astudiaeth fanwl o weithiau Thomas Edwards, awdur y *Gangræna*. Yn rhifynnau cyntaf *Seren Gomer* am 1949, nid oedd ganddo ddim llai nag wyth o gyfraniadau, y rhai trymaf ohonynt yn trin gwahanol agweddau ar hanes Bedyddwyr cynnar Lloegr a Chymru. Cyn diwedd yr un flwyddyn yr oedd pump ysgrif goffa amdano ef ei hun yn *Seren Gomer*, gwaith ei gydathrawon, hen ddisgyblion iddo, ac un cydfyfyriwr gynt, y Parch A. J. George. Bu farw 30 Gorffennaf 1949.

## Awdur

Thomas Richards, (1878 - 1962)

## Ffynonellau

*Seren Cymru*, 12 Awst 1949

*Seren Gomer*, 1949

## Dolenni Ychwanegol

Wikidata: [Q20733961](https://www.wikidata.org/wiki/Q20733961)

**Dyddiad cyhoeddi:** 1970

**Hawlfraint Erthygl:** <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

